

《無量壽經優婆提舍願生偈》 補充講表

◎附表六：

○正覺阿彌陀，法王善住持。

《佛說無量壽經》卷下云：「佛告阿難：其有眾生，生彼國者，皆悉住於正定之聚。所以者何？彼佛國中，無諸邪聚，及不定聚。」

《佛說無量壽經》云：

設我得佛，國中天人，若起想念貪計身者，不取正覺。（第十願、不貪計身）

設我得佛，國中天人，不住定聚，必至滅度者，不取正覺。（第十一願、住定證滅）

○如來淨華眾，正覺華化生。（以下糅合蓮池大師《佛說阿彌陀經疏鈔》卷二）

※蓮華者，往生彼國托質之所。念佛之人，特宜知此。

托質者，未證無生，生必有托。六趣眾生，則中陰之身，自求父母。往生善士，則一彈指

頃，蓮華化生。是蓮華者：乃卸凡殼之玄宮，安慧命之神宅。

※修淨土者：若禮佛時，當想己身在蓮華中作禮，佛在蓮華中受我禮敬。若念佛時，當想己身在蓮華中，結跏趺坐，佛在蓮華中，接引於我，然後一心持名。

※昔有二僧，作蓮華開合想，遂得往生，況復加之一心持名而不生者。

《佛說無量壽經》云：

設我得佛，國中天人，不悉真金色者，不取正覺。（第三願、身真金色）

設我得佛，國中天人，形色不同，有好醜者，不取正覺。（第四願、形色相同）

設我得佛，國中天人，不悉成滿三十二大人相者，不取正覺。（第二十一願、三十二相）

設我得佛，國中菩薩，不得金剛那羅延身者，不取正覺。（第二十六願、那羅延身）

※阿難！彼佛國土，諸往生者，具足如是清淨色身，諸妙音聲，神通功德。

※其諸聲聞菩薩天人，智慧高明，神通洞達，咸同一類，形無異狀，但因順餘方，故有天人

之名。顏貌端正，超世希有，容色微妙，非天非人，皆受自然虛無之身，無極之體。

○愛樂佛法味，禪三昧為食。（以下糅合《往生論註》）

愛樂佛法味者：如日月燈明佛說法華經，六十小劫。時會聽者，亦坐一處，六十小劫，謂如食頃。無有一人，若身若心而生懈怠。以禪定為食者：謂諸大菩薩常在三昧，無他食也。三昧者，彼諸人天若須食時，百味嘉饈，羅列在前。眼見色，鼻聞香，身受適悅，自然飽足，訖已化去。若須復現，其事在經。是故言：愛樂佛法味，禪三昧為食。

一、供佛聞法：以下為《佛說無量壽經》經文。

佛語阿難：彼國菩薩，承佛威神，一食之頃，往詣十方無量世界，恭敬供養，諸佛世尊。隨心所念華香、伎樂，衣蓋、幢幡，無數無量供養之具，自然化生，應念即至。珍妙殊特，非世所有，輒以奉散諸佛，及諸菩薩聲聞之眾。在虛空中，化成華蓋，光色昱爍，香氣普熏。其華周圍四百里者，如是轉倍，乃覆三千大千世界，隨其前後，以次化沒。其諸菩薩僉然欣

悅，於虛空中，共奏天樂，以微妙音，歌歎佛德，聽受經法，歡喜無量。供養佛已，未食之前，忽然輕舉，還其本國。

二、彌陀說法

佛語阿難：無量壽佛，為諸聲聞菩薩天人頒宣法時，都悉集會七寶講堂，廣宣道教，演暢妙法，莫不歡喜，心解得道。即時四方自然風起，吹七寶樹，出五音聲。無量妙華，隨風四散，自然供養，如是不絕。一切諸天，皆齋天上百千華香，萬種伎樂，供養其佛，及諸菩薩聲聞之眾。普散華香，奏諸音樂，前後來往，更相開避。當斯之時，熙怡快樂，不可勝言。

三、樂聲說法

亦有自然萬種伎樂。又其樂聲，無非法音。清暢哀亮，微妙和雅，十方世界音聲之中，最為第一。

四、道場寶樹說法

一、明道場樹體量

又無量壽佛，其道場樹，高四百萬里，其本周圍五千由旬，枝葉四布二十萬里，一切眾寶自然合成。

二、明道場樹莊嚴

以月光摩尼持海輪寶，眾寶之王，而莊嚴之。周匝條間，垂寶瓔珞，百千萬色，種種異變，無量光炎，照曜無極。珍妙寶網，羅覆其上，一切莊嚴，隨應而現。

三、明道場樹功用

微風徐動，吹諸寶樹，演出無量妙法音聲。其聲流布，徧諸佛國。聞其音者，得深法忍，住不退轉，至成佛道，耳根清徹，不遭苦患。目覩其色，鼻知其香，口嘗其味，身觸其光，心以法緣，皆得甚深法忍，住不退轉，至成佛道，六根清徹，無諸惱患。阿難，若彼國土天人，見此樹者，得三法忍：一者音響忍，二者柔順忍，三者無生法忍。此皆無量壽佛威神力故，

本願力故，滿足願故，明了願故，堅固願故，究竟願故。

○永離身心惱，受樂常無間。

身惱者：飢渴寒熱殺害等也。心惱者：是非得失三毒等也。

《佛說無量壽經》云：

設我得佛，國有地獄、餓鬼、畜生者，不取正覺。（第一願、國無惡道）

設我得佛，國中天人壽終之後，復更三惡道者，不取正覺。（第二願、不更惡道）

設我得佛，國中天人，所受快樂，不如漏盡比丘者，不取正覺。（第三十九願、樂如漏盡）

※又彼菩薩，乃至成佛，不受惡趣，神通自在，常識宿命。除生他方五濁惡世，示現同彼，

如我國也。（《佛說無量壽經》卷下）

○大乘善根界，等無譏嫌名，女人及根缺，二乘種不生。

※大乘定義：大者：絕待無外，強名曰大。即是直指眾生現前介爾心性，法爾具足體大、

相大、用大三種義故。乘者：約喻為名，運載為義。即是直指眾生現前介爾心性，法爾運載至於佛地。自利利他，無休息故，名為乘也。（糅合《大乘起信論裂網疏》卷一）

※譏嫌：譏議嫌惡。《後漢書·馬嚴傳》：「明德皇后既立，嚴乃閉門自守，猶復慮致譏嫌，

遂更徙北地，斷絕賓客。」

※問曰：尋法藏菩薩本願，及龍樹菩薩所讚，皆似以彼國聲聞眾多為奇。此有何義？

答曰：聲聞以實際為證，計不應更能生佛道根芽。而佛以本願不可思議神力，攝令生彼，必當復以神力，生其無上道心。譬如鳩鳥入水，魚蚌咸死。犀牛觸之，死者皆活。

如此不應生而生，所以可奇。（糅合《往生論註》）

○眾生所願樂，一切能滿足。（莊嚴一切所求滿足功德）

《華嚴經》云：「十方所有諸眾生，願離憂患常安樂，獲得甚深正法利，滅除煩惱盡無餘。」

《佛說無量壽經》云：「佛告阿難：彼國菩薩，皆當究竟一生補處。」